

佛說法受塵經

卷六

十二

後漢安息國三藏安世高譯

聞如是一時佛遊於舍衛國祇樹給孤獨園
佛告諸比丘比丘受教從佛而聽佛言比丘
凡人爲一法受塵自汙迷惑憂愁沒無端際
吾見其不得無上吉祥之道如丈夫欲見女
子色是以好色之士爲染爲醉爲貪爲汙爲
惑爲著爲住爲受從婬女言故長久趨走往
來爲受勤苦耳常欲聞婬女之聲鼻欲聞其
香舌欲得其味身欲更其細滑是以長久趨
走往來受苦是故不當爲女色聲香味細滑
所染惑也當覺知是又復諸比丘凡人爲法
受塵自汙迷惑憂愁沒而無際吾見其不得
無上吉祥之道如婬女欲見男子好色之女
爲染爲醉爲貪爲汙爲惑爲著爲住爲受當

爲士色故長久趨走往來受苦耳常欲聞男
子之聲鼻欲聞其香舌欲得其味身欲更其
細滑是以長久趨走往來受苦是故不當爲
士色聲香味細滑所染惑也當覺知是佛說
是已皆歡喜受行

敬六

佛說法受塵經